

goar ne warth, doas unser Hargutt de Weiber geschoaffen hoat, ader seiner do viele, vun dan de Weiber in Laben se freindlich Wurt hier'n un se zufriednes Gesichte sahn un die eemer nor uff sich denk'n. Wenn der Moann anne Dummhet gemacht hot oders es'n woas arschlich gegang'n, do ward de Frau oangepfuzt, un wenss Hei verrag'nt es oder de Pflanzen sein fer Hize omgefall'n, do muß de Frau droan schuld sein. Brängt se Ubern,¹⁾ do tog'n²⁾ i'n ne, un brängt se Fleisch, do heßts: Du host kene Einthelche. Hot se a Malliehr,³⁾ doas angieht'n ne, un ar macht a Waderns⁴⁾ dröm, hot se ader woas rajcht gemacht, do hot'r keene Dg'n derschür. Freeßt's de Frau o rein, wenn se eemmer su Unrajcht leid'n muß, 's läßt an Stachel zoröck, se ward gleichgiltig, un schinner o ne. Ich denke, doas de verheiroath'n Weibsn eemmer su bale 's schiene Fleckl verlier'n, do sein nor de Moann'n droan schuld. Weeß denn Keener, woas ar eigentlich oan senner Frau hot, wie se anne Gehilf'n es, ader ne anne Mooid⁵⁾ sein sull oder no wing'r?⁶⁾ De Mooid fricht ihr'n Luhn un koann met'n Sohre oabziehen, de Frau muß aushalen. Ich denke, ich bi ne groade goarschtig gewesen gegen menne Frau, ader moanchmol denk'ch doache: hättst ser o no moanchmol kinn mieh merken loss'n, wie wuhl dersch thoat, wenn se mer eemmer's Beste zuschub, un wenn se su fleiß'g un su einthelchsch⁷⁾ woar, un wenn se mer im Verbeigiehn su sachte iber de Wang'n stretchelte, ohne woas zu soin, un wie se mer gutt zurädde, wenn mer woas im Koppe röm ging, un wie se mich su verständ'g römfrichte, wenn'ch a mol hiz'g woar un met beeden Beenen neinschpring'n wullte. Un wenn'ch menne Kinder oansah, do denk'ch, woas se do met jed'n fer Mihe gehott hoat, un wie se fersche⁸⁾ gebatt hoat, un mer hoan o zusoamm'n gebatt, — doas kimmt ader ne in viel'n Hoisern mieh für, un es do's Nuthwendgste. 'S fahlt mer sunst nischt, un de Kinder ästemir'n mich, ader ich wüllte sunst woas gahn, wennch er oack a eenzges mol soin fennte, wie mersch nu gieht, un fennte mich met'r aussprechn und'r in de troiharzgn Dg'n sahn un se bei der Hand nahm. Sah't'r, doas mißt'r thun, weil'r de Frau hoat, mißt o amol zu er soin: „ne, woas Du ader

1) Kartoffeln. 2) taugen. 3) Malheur=Unglück. 4) Wetterns.
5) Magd. 6) weniger. 7) sparsam. 8) für sie.